



JUDICIAL SYSTEM MONITORING PROGRAMME
PROGRAMA MONITORIZASAUN BA SISTEMA JUDISIÁRIU

Sumáriu Kazu

Tribunál Distritál Oe-Cusse

Maiu 2015

Sumáriu prosesu julgamentu kazu iha Tribunál Distritál Oe-Cusse Períodu Maiu 2015

Introdusaun

Iha Maiu 2015, JSMP kontinua hala'o atividade monitorizasaun ba prosesu julgamentu kazu iha Tribunál Distritál Oe-Cusse. Iha edisaun ne'e sumariza 33 hosi kazu 42 ne'ebé Tribunál Distritál Oe-Cusse julga. JSMP la konsege hala'o monitorizasaun ba kazu hotu tanba komitmentu institusional urjenti seluk.

Kazu krime 33 ne'e kompostu hosi ofensa ba integridade fízika simples ho natureza violénsia doméstika 19, tentativa omisídiu agravadu ho natureza violénsia doméstika 1, abuzu seksuál ba menór 1, maus-tratus ba kónjuje 1, ameasa no ofensa ba integridade fízika simples 1, ofensa ba integridade fízika simples 4, kondusaun sein karta 5 no danu simples 1.

Entre kazu 33 ne'e, kazu 30 mak tribunál konklui ona nia prosesu no kazu 3 seluk sei iha prosesu nia laran.

Tuir mai deskripsaun sumáriu julgamentu kazu kompletu :

1. Krime abuzu seksuál ba menór – Nú. Prosesu : 16/krime/2015/TDO¹

Kompozisaun Tribunál : Koletivu
Juis : Dr. João Ribeiro, Dra. Jumiaty Freitas no Dra. Fransisca Cabral
Ministériu Públiku : Dr. Ambrosio Rangel Freitas
Defeza : Dr. Afonso Gomes Fatima
Konkluzau : Kondena ho pena prizaun tinan 20

Iha 07 Maiu 2015, Tribunál Distritál Oe-Cusse kondena arguidu ba kazu inestu ho pena prizaun tinan 20 tanba provadu komete krime abuzu seksuál ba menór hasoru nia oan hakiak ne'ebé sei ho idade tinan 13 ne'ebé akontese iha tinan 2013 no 2014, iha Distritu Oe-Cusse.

¹ Favor lee Komunikazu Imprensa JSMP, edisaun 18 Maiu 2015: Tribunál Distritál Oe-Cusse kondena pena tinan 20 prizaun ba arguidu kazu inestu, iha website JSMP: www.jsmp.tl

Tribunál prova katak arguidu komete violasaun seksuál hasoru lezada dala 10 iha tinan 2013 no 2014. Aktu hirak ne'e kauza lezada hetan isin-rua no agora hahoris bebe ida.

Bazeia ba faktu provadu hirak ne'e tribunál konklui prosesu ne'e no kondena arguidu ho pena prizaun tinan 9 ba krime primeíru no tinan 7 ba krime ida-idak seluk. Finalmente, tribunál akumulá pena hirak ne'e no kondena arguidu ho pena tinan 20 iha prizaun.

2. Krime maus tratus ba kónjuje – Nú. Prosesu : 15/krime/2015/TDO

Kompozisaun Tribunál : Koletivu
Juis : Dr. João Ribeiro, Dra. Jumiaty Freitas no Dra. Fransisca Cabral
Ministériu Públiku : Dr. Ambrosio Rangel Freitas
Defeza : Dr. Calisto Tout
Konkluzau : Kondena ho pena prizaun tinan 3 suspende ba tinan 4

Iha 07 Maiu 2015, Tribunál Distritál Oe-Cusse prezide julgamentu leitura akordaun no kondena arguidu AN ho pena prizun tinan 3 suspende ba tinan 4 tanba provadu komete krime maus tratus ba kónjuje hasoru nia feen, ne'ebé akontese iha tinan 2014 no tinan sira antes, iha Distritu Oe-Cusse.

Tribunál prova katak iha 10 Setembru 2014, arguidu tuku iha lezada nia ulun dala tolu, rasta ba rai no basa dala ida iha lezada nia hasan karuk.

Tribunál mós prova katak antes ne'e, iha tinan 2012 kalan, arguidu basa dala ida iha lezada nia hasan loos. Tuir-mai maizumenus iha Marsu 2013, arguidu basa dala rua iha lezada nia hasan karuk no iha Abril 2014, arguidu basa lezada dala ida tan iha hasan loos.

Bazeia ba faktu hirak ne'e, tribunál konklui prosesu kazu ne'e no kondena arguidu AN ho pena prizaun tinan 3 suspende ba tinan 4.

3. Krime amesa no ofensa ba integridade fízika simples – Nú. Prosesu : 46/krime/2015/TDO

Kompozisaun Tribunál : Singulár
Juis : Dr. João Ribeiro
Ministériu Públiku : Dr. Ambrosio Rangel Freitas
Defeza : Dr. Calisto Tout
Konkluzau : Omologa

Iha 08 Maiu 2015, Tribunál Distritál Oe-Cusse prezide julgamentu tentativa konsiliaun ba kazu amesa no ofensa ba integridade fízika simples ne'ebé involve arguidu UdS hasoru EdC, iha Janeiro 2015, iha Pante-Makassar, Distritu Oe-Cusse.

Ministériu Públiku akuza arguidu kontra artigu 157 Kódigu Penál kona-ba krime ameasa no artigu 145 Kódigu Penál kona-ba ofensa ba integridade fízika simples.

Iha prosesu tentativa konsiliaun ne'e, arguidu rekoñese nia sala no husu diskulpa ba lezadu. Tanba sei iha relasaun família no servisu iha fatin hanesan, nune'e lezadu hakarak deziste prosesu ne'e.

Bazeia ba pedidu dezistensia ne'e, tribunál omologa prosesu ne'e no absolve arguidu hosi akuzasaun ministériu públiku.

4. Krime ofensa ba integridade fízika simples ho natureza violénsia doméstika – Nú. Prosesu : 60/krime/2015/TDO

Kompozisaun Tribunál : Singulár
Juis : Dr. João Ribeiro
Ministériu Públiku : Dr. Ambrosio Rangel Freitas
Defeza : Dr. Afonso Gomes Fatima
Konkluzau : Kondena ho pena prizaun fulan 9 suspende ba tinan 1

Iha 11 Maiu 2015, Tribunál Distritál Oe-Cusse prezide julgamentu leitura sentensa no kondena arguidu MCS ho pena prizaun fulan 9 suspende ba tinan 1 tanba provadu komete krime ofensa ba integridade fízika simples hasoru nia feen, iha 16 Janeiru 2015, iha, Distritu Oe-Cusse.

Tribunál prova katak iha 16 Janeiru 2015, maizumenus iha tuku 16:00 lorokraik, arguidu tebe lezada nia reen-toos dala-rua no dala ida iha matan sorin karuk nia okos tanba diskuti kona-ba lia adat. Aktu ne'e rezulta lezada sofre kanek iha matan okos no bubu iha nia reen-toos.

Ministériu Públiku akuza arguidu kontra artigu 145 Kódigu Penál kona-ba ofensa ba integridade fízika simples konjuga ho artigu 35 (b) Lei Kontra Violénsia Doméstika.

Iha julgamentu antes, iha 07 Maiu 2015, arguidu konfesa faktus integralmente, arrepende ninia hahalok no deklarata katak sira dame malu ona to'o agora.

Iha alegasaun finál, ministériu públiku husu ba tribunál atu aplika pena prizaun tinan 1 suspende ba tinan 1 fulan 6.

Entretantu, defeza husu ba tribunál atu aplika pena admoestasaun tanba arguidu konfesa faktus integralmente, arrepende ba ninia hahalok, kolabora diak ho tribunál, foin primeira-vez hatan iha tribunál no dame malu ona ho lezada.

Bazeia ba faktu hirak ne'e, tribunál konklui prosesu ne'e no kondena arguidu ho pena prizaun fulan 9 suspende ba tinan 1.

5. Krime ofensa ba integridade fízika simples ho natureza violénsia doméstika – Nú. Prosesu : 65/krime/2015/TDO

Kompozisaun Tribunál : Singulár

Juis : Dr. João Ribeiro
Ministériu Públiku : Dr. Ambrosio Rangel Freitas
Defeza : Dr. Calisto Tout
Konkluzau : Kondena ho pena prizaun tinan 2 suspende ba tinan 3

Iha 11 Maiu 2015, Tribunál Distritál Oe-Cusse hala'ó prosesu julgamentu ba kazu ofensa ba integridade fízika simples no ameasa ne'ebé involve arguidu DFN hasoru MA nu'udar arguidu nia tiun no RA nu'dar arguidu nia feen, iha 12 Janeiru 2015, iha Distritu Oe-cusse.

Ministériu Públiku akuza arguidu kontra artigu 145 Kódigu Penál kona-ba krime ofensa ba integridade fízika simples no kontra artigu 157 Kódigu Penál kona-ba krime ameasa.

Iha prosesu julgamentu ne'e, tribunál halo tentativa konsiliaun ba kazu krime ameasa tanba krime ne'e ho natureza semi públiku.

Iha prosesu ne'e arguidu rekoñese nia sala no husu diskulpa ba lezadu no lezada. Lezadu no lezada mós fo perdua ba arguidu no sira hakarak deziste tiha prosesu kazu ne'e.

Ministériu Públiku no defeza konkorda ho inisiativa diak ne'e. Ikus-mai, bazeia ba pedidu dezistencia ne'e, tribunál omologa prosesu ne'e no absolve arguidu hosi krime ameasa ne'ebé ministériu públiku akuza hasoru arguidu.

Depois omologa tiha prosesu ne'e, tribunál kontinua hala'ó prosesu julgamentu ba krime ofensa ba integridade fízika simples hasoru nia feen.

Iha julgamentu ne'e, arguidu konfesa no rekoñese katak nia komete duni krime no deklara katak nia arrepende nia hahalok no arguidu mós deklara katak nia dame malu ona ho lezada.

Iha alegasaun finál, ministériu públiku husu ba tribunál atu kondena arguidu ho pena prizaun tinan 2 suspende ba tinan 3 atu prevene krime hanesan akontese tan iha futuru tanba krime ne'e akontese iha Oe-Cusse. Aleinde ne'e, arguidu mós antes ne'e komete ona krime hasoru lezada no hetan kondenasau suspensaun ba pena prizaun no nia períodu liuona.

Iha parte seluk, defeza husu ba tribunál atu aplika pena ne'ebé adekuaudu tuir arguidu nia kulpa maibé konsidera sirkunstánsia atenuantes ne'ebé asosiadu ho prosesu ne'e.

Iha 18 Maiu 2015, tribunál konklui prosesu ne'e no kondena arguidu ho pena prizaun tinan 2 maibé suspende ba tinan 3.

6. Krime ofensa ba integridade fízika simples ho natureza violénsia doméstika – Nú. Prosesu : 63/krime/2015/TDO

Kompozisaun tribunál : Singulár
Juis : Dr. João Ribeiro
Ministériu Públiku : Dr. Ambrosio Rangel Freitas
Defeza : Dr. Calisto Tout

Konkluzau : Kondena ho pena prizaun fulan 9 suspensaun ba tinan 1

Iha 11 Maiu 2015, Tribunál Distritál Oe-Cusse prezide julgamentu ho agenda leitura sentensa ba kazu krime ofensa ba integridade fízika simples ne'ebé komete hosi arguidu MB hasoru nia feen, iha 23 Dezembru 2014, iha Distritu Oe-Cusse.

Tribunál prova katak iha 23 Dezembru 2014, maizumenus tuku 16:00 lorokraik, arguidu basa dala ida iha lezada nia hasan loos, dala rua iha kanuruk no tebe dala ida iha kelen sorin karuk. Kazu ne'e akontese tanba iha hanoin lahanesan wainhira sira diskuti malu.

Ministériu Públiku akuza arguidu kontra artigu 145 Kódigu Penál kona-ba ofensa ba integridade fízika simples konjuga ho artigu 35 (b) Lei Kontra Violénsia Doméstika.

Bazeia ba faktus hirak ne'e hotu, tribunál konklui prosesu ne'e no kondena arguidu ho pena prizaun fulan 9 suspende ba tinan 1.

7. Krime ofensa ba integridade fízika simples – Nú. Prosesu : 68/krime/2015/TDO

Kompozisaun Tribunál : Singulár
Juis : Dr. João Ribeiro
Ministériu Públiku : Dr. Ambrosio Rangel Freitas
Defeza : Dr. Afonso Gomes Fatima
Konkluzau : Kondena ho pena prizaun fulan 3 suspende ba fulan 6

Iha 11 Maiu 2015, Tribunál Distritál Oe-Cusse prezide julgamentu ba kazu ofensa ba integridade fízika simples ne'ebé komete hosi arguida IN hasoru MS, 16 Novembru 2014, iha Sub-distritu Passabe, Distritu Oe-cusse.

Ministériu Públiku akuza arguida katak iha 16 Novembru 2014, maizumenus iha tuku 15:00 lorokraik, arguida ba iha lezadu nia toos no trata lezadu katak oin aat, likrauk, fahi no asu. Tanba ne'e lezadu mós trata fila fali arguida katak arguida mós oin aat, likrauk, fahi, asu no fetu puta. Depoisde ne'e arguida foti fatuk ida tuda iha lezadu nia kotuk laran no rejulta lezadu hetan kanek no bubu. Kazu ne'e junta mós ho relatóriu mediku no fotografia hosi Centru Saúde.

Ministériu Públiku akuza arguida kontra artigu 145 Kódigu Penál kona-ba ofensa ba integridade fízika simples.

Tribunál tenta konsilia parte rua maibé lezadu mantein nia pozisaun atu prosesa nia kazu, nune'e tribunál kontinua hala'o prosesu julgamentu.

Iha prosesu julgamentu arguida rekoñese no konfesa katak faktu sira hosi akuzasaun ministériu públiku no deklara katak nia arrepende no promete sei la repete ninia hahalok iha futuro.

Iha alegasaun finál, ministériu públiku husu ba tribunál atu kondena arguida ho pena prizaun fulan 6 suspende ba tinan 1.

Entretantu, defeza husu tribunál aplika pena admoestasaun ba arguida maibé sekarik tribunál iha hanoin seluk husu atu tribunál fo justisa no husu atu tetu sirkunstansia atenuantes no agravantes ne'ebé haleu arguida.

Depois rona tiha alegasaun finál, tribunál konklui prosesu kazu ne'e no kondena arguida ho pena pena prizaun fulan 3 maibé suspende ba fulan 6.

8. Krime danu simples – Nú. Prosesu. 66/krime/2015/TDO

Kompozisaun Tribunál : Singulár
Juis : Dr. João Ribeiro
Ministériu Públiku : Dr. Ambrosio Rangel Freitas
Defeza : Dr. Calisto Tout
Konkluzau : Omologa

Iha 11 Maiu 2015, Tribunál Distritál Oe-Cusse prezide julgamentu tentativa konsiliaun ba kazu danu simples ne'ebé involve arguidu PT no JT hasoru CT, ne'ebé akontese iha Oe-silo, Distritu Oe-Cusse.

Ministériu Públiku akuza katak iha 28 Dezembru 2014, maizumenus iha tuku 15:00 lorokraik, arguidu sira ba sobu lezadu nia uma no kauza didin uma naksobu no hetan estragus.

Ministériu Públiku akuza arguidu sira kontra artigu 258 Kódigu Penál kona-ba danu simples.

Iha prosesu ne'e, arguidu sira rekoñese sira ninia hahalok no husu diskulpa ba lezadu. Iha parte seluk, lezadu simu arguidu sira nia diskulpa tanba lezadu no arguidu sira sei iha relasaun família no lezadu hakarak deziste tiha prosesu kazu ne'e.

Ministériu Públiku no defeza konkorda ho iniciativa hosi parte rua atu deziste prosesu kazu ne'e.

Bazeia ba pedidu dezistensia ne'e, tribunál omologu prosesu ne'e no absolve arguidu sira hosi akuzasaun ministériu públiku.

9. Krime kondusaun sein karta – Nú. Prosesu : 17/sum/2015/TDO

Kompozisaun Tribunál : Singulár
Juis : Dr. Joao Ribeiro
Ministériu Públiku : Dr. Ambrosio Rangel Freitas
Defeza : Dr. Afonso Gomes Fatima
Konkluzau : Kondena ho pena multa US\$75.00

Iha 11 Maiu 2015, Tribunál Distritál Oe-Cusse hala'o prosesu julgamentu ba kazu kondusaun sein karta ne'ebé involve arguidu Estevão Tani no Jose Coa, iha 08 Maiu 2015, iha Pante-Makassar, Distritu Oe-Cusse.

Ministériu Públiku akuza katak iha 08 Maiu 2015, Unidade Tranzitu Polisia Distritu Oe-Cusse prende arguidu Estevão no Jose tanba kondus kareta truk ho Nú. Madrikula 512612-TL no truk ho Nú. Matrikula 500012-TL sein karta kondusaun no hatama arguidu sira iha sela polísia.

Ministériu Públiku akuza arguidu sira kontra artigu 207 Kódigu Penál kona-ba krime kondusaun sein karta.

Iha julgamentu arguidu sira deklara katak los duni sira lori kareta sein karta kondusaun tanba sira foin lori kareta durante fulan 2 ka fulan 3 no deklara katak sira arrepende ba sira nia hahalok.

Ministériu Públiku husu ba tribunál la rona depoimentu hosi testemuña tanba arguidu sira konfesa faktu sira hosi akuzasaun ministériu públiku nian.

Iha alegasaun finál, ministériu públiku ministériu públiku husu ba tribunál atu kondena arguidu ho pena multa US\$75.00 ne'ebé kada loron arguidu sei selu US\$1.00 durante loron 75.

Iha parte seluk, defeza hare katak arguidu sira konfesa faktus integralmente nune'e bazeia ba sirkunstánsia agravantes no antenuantes arguidu sira, husu ba tribunál atu aplika pena ne'ebé adekuaudu tuir arguidu sira nia kulpa no rendimentu.

Depois avalia faktus sira ne'ebé produz durante prosesu julgamentu, tribunál konklui prosesu kazu ne'e no kondena kada arguidu ho pena multa US\$75.00 ne'ebé kada loron arguidu ida-idak sei selu US\$1.00 durante loron 75. Tribunál mós aplika pena alternativa durante loron 50 kumpri iha prizaun kuandu arguidu sira la selu pena multa refere.

10. Krime kondusaun sein karta – Nú. Prosesu : 18/sum/2015/TDO

Kompozisaun Tribunál	: Singulár
Juis	: Dr. Joao Ribeiro
Ministériu Públiku	: Dr. Ambrosio Rangel Freitas
Defeza	: Dr. Afonso Gomes Fatima
Konkluzau	: Kondena ho pena multa US\$75.00

Iha 11 Maiu 2015, Tribunál Distritál Oe-Cusse mós julga kazu kondusaun sein karta ne'ebé involve arguidu Agustino Ulan, ne'ebé akontese iha 08 Maiu 2015, iha Pante-Makassar, Distritu Oe-Cusse.

Ministériu Públiku akuza katak iha 08 Maiu 2015, PNTL liuhosi unidade tranzitu halo pasa revista no prende arguidu nia kareta no hatama arguidu ba iha sela polísia tanba arguidu kondus kareta sein karta kondusaun.

Ministériu Públiku akuza arguidu kontra artigu 207 Kódigu Penál kona-ba kondusaun sein karta.

Iha prosesu julgamentu, arguidu konfesa no arrepende ba ninia hahalok no deklara katak nia foin lori kareta fulan 2.

Ministériu Públiku husu ba tribunál atu presinde testemuña tanba arguidu konfesa integral ba faktus iha akuzasaun laran.

Iha alegasaun finál, ministériu públiku husu ba tribunál atu aplika pena multa US\$75.00 ne'ebé kada loron arguidu selu US\$1.00 durante loron 75. Defeza husu tribunál atu aplika pena ne'ebé adekuaudu tuir arguidu-nia rendimentu no sirkunstánsia atenuantes no agravantes hosi kazu ne'e.

Tribunál konklui prosesu ne'e no kondena arguidu ho pena multa US\$75.00 ne'ebé kada loron arguidu selu US\$1.00 durante loron 75 no aplika pena alternativa loron 50 prizaun kuandu arguidu la selu pena multa refere.

11. Krime ofensa ba integridade fízika simples ho natureza violénsia doméstika – Nú. Prosesu : 44/krime/2015/TDO

Kompozisaun Tribunál : Singulár
Juis : Dr. João Ribeiro
Ministériu Públiku : Dr. Ambrosio Rangel Freitas
Defeza : Dr. Afonso Gomes Fatima
Konkluzau : Absolve

Iha 12 Maiu 2015, Tribunál Distritál Oe-Cusse prezide julgamentu ho agenda leitura sentensa ba kazu ofensa ba integridade fízika simples ne'ebé involve arguida FC hasoru nia laen, iha 24 Dezembru 2014, iha Distritu Oe-cusse.

Tribunál prova katak iha 24 Dezembru 2014, maizumenus iha tuku 10:00 kalan, lezadu fila hosi misa ho kondisaun lanu, basa arguida dala ida iha hasan loos no buti arguida ninia kakorok. Tanba ne'e arguida tata fila fali lezadu nia liman no dudu lezadu to'o lezadu monu.

Ministériu Públiku akuza arguidu kontra artigu 145 Kódigu Penál kona-ba ofensa ba integridade fízika simples konjuga ho artigu 35 (b) Lei Kontra Violénsia Doméstika.

Bazeia ba faktu hirak ne'e hotu, tribunál konklui prosesu ne'e no absolve arguida FC hosi krime refere tanba tribunál prova katak arguida no lezadu baku malu.

Iha prosesu julgamentu antes iha 08 Maiu 2015, arguida konfesa parsialmente ba iha tribunál katak wainhira lezadu hanehan nia ulun mak arguida kaer nia kakorok no tata nia tanba hetan provokasaun hosi lezadu. Arguida mós deklara katak sira dame malu ona no moris hamutuk nu'udar feen no laen hanesan bain-bain.

12. Krime ofensa ba integridade fízika simples ho natureza violénsia doméstika – Nú. Prosesu : 45/krime/2015/TDO

Kompozisaun Tribunál : Singulár
Juis : Dr. João Ribeiro
Ministériu Públiku : Dr. Ambrosio Rangel Freitas
Defeza : Dr. Afonso Gomes Fatima
Konkluzau : Kondena ho pena prizaun fulan 9 suspende ba tinan 1

Iha 12 Maiu 2015, Tribunál Distritál Oe-Cusse hala'o prosesu julgamentu ho ajenda leitura sentensa ba kazu krime ofensa ba integridade fízika simples ne'ebé involve arguidu MTdS hasoru nia feen. Kazu ne'e akontese iha 04 Janeiro 2015, iha Distritu Oe-Cusse.

Tribunál prova katak iha 04 Janeiro 2015, maizumenus iha tuku 18:00 lorokraik, arguidu basa dala ida iha lezada nia hasan parte loos no riba lezada ba rai no rezulta lezada sofre moras iha nia isin lolon. Kazu ne'e akontese tanba lezada soe telefone ba rai.

Tuir fali iha 05 Janeiro 2015, maizumenus iha tuku 08:00 dader, arguidu basa tan dala ida iha lezada nia kanuruk. Kazu ne'e akontese tanba lezada dehan arguidu baruk ten.

Ministériu Públiku akuza arguidu kontra artigu 145 Kódigu Penál kona-ba ofensa ba integridade fízika simples konjuga ho artigu 35 (b) Lei Kontra Violénsia Doméstika.

Iha prosesu julgamentu antes (iha 08 Maiu 2015), arguidu konfesa, arrepende no deklara katak depois akontesimentu sira dame malu kedas.

Iha alegasaun finál, ministériu públiku husu ba tribunál atu aplika pena prizaun tinan 1 maibé suspende tiha ba tinan 1 fulan 6. Entretantu defeza husu ba tribunál atu aplika pena admoestasaun tanba arguidu konfesa faktus integralmente, arrepende ba ninia hahalok, kolabora diak ho tribunál no dame malu ona ho lezada.

Bazeia ba faktu hirak ne'e hotu, tribunál konklui prosesu ne'e no kondena arguidu ho pena prizaun fulan 6 relasiona ho krime ne'ebé akontese iha 04 Janeiro 2015.

Entretantu, ba krime ne'ebé akontese iha 05 Janeiro 2015, tribunál kondena arguidu ho pena prizaun fulan 7. Tribunál akumulá pena rua ne'e no konklui kondena arguidu ho pena únika fulan 9 prizaun suspende ba tinan 1.

13. Krime ofensa ba integridade fízika simples – Nú. Prosesu :48/krime/2015/TDO

Kompozisaun Tribunál	: Singulár
Juis	: Dr. João Ribeiro
Ministériu Públiku	: Dr. Ambrosio Rangel Freitas
Defeza	: Dr. Calisto Tout
Konkluzau	: Omologa

Iha 14 Maiu 2015, Tribunál Distritál Oe-Cusse prezide julgamentu tentativa konsiliaun ba kazu ofensa ba integridade fízika simples ne'ebé involve arguidu JE hasoru SS, iha 12 Dezembru 2014, iha Distritu Oe-Cusse.

Ministériu Públiku akuza arguidu katak iha 12 Dezembru 2014, maizumenus iha tuku 08:00 dader, arguidu tebe dala ida iha lezada nia kelen loos no buti lezada nia kakorok. Kazu ne'e akontese tanba lezada ba iha arguidu nia uma no sisi osan restu US\$53.00 ne'ebé arguidu seidauk selu ba lezada nia laen nu'udar karpinteriu (badaen) iha arguidu nia uma. Kazu ne'e junta mós ho relatóriu médiku no fotografia hosi ospital.

Ministériu Públiku akuza arguidu kontra artigu 145 Kódigu Penál kona-ba ofensa ba integridade fízika simples.

Iha prosesu ne'e, arguidu rekoñese nia sala no husu diskulpa ba lezada. Arguidu intrega kedas osan US\$10.00 ba lezada no lezada rasik hakarak atu taka kazu ne'e.

Bazeia ba pedidu dezistensia hosi lezadu, tribunál omologa prosesu ne'e no absolve arguidu hosi akuzasaun ministériu públiku.

14. Krime ofensa ba integridade fízika simples – Nú. Prosesu : 50/krime/2015/TDO

Kompozisaun Tribunál : Singulár
Juis : Dr. João Ribeiro
Ministériu Públiku : Dr. Ambrosio Rangel Freitas
Defeza : Dr. Afonso Gomes Fatima
Konkluzau : Omologa

Iha 14 Maiu 2015, Tribunál Distritál Oe-Cusse prezide julgamentu tentativa konsiliaun no omologa prosesu kazu ofensa ba integridade fizika simples ne'ebé involve arguida FdR hasoru nia alin mane. Kazu ne'e akontese iha 01 Janeiru 2015, iha Distritu Oe-Cusse.

Ministériu Públiku akuza katak iha 01 Janeiru 2015, maizumenus iha tuku 15:00 lorokraik, wainhira lezadu fila ba uma ho kondisaun lanu. Wainhira hare arguida tuur hela iha sira nia uma, lezadu tolok no dehan arguida feto aat, feto kontador no bobar lia. Tanba ne'e, arguida nervoza no kaer lezadu nia liman dada sai mai liur basa dala ida iha hasan, tuku dala ida iha kotuk laran, tebe dala barak to'o lezadu monu ba rai no sama iha lezadu nia kanotak.

Ministériu Públiku akuza arguida kontra artigu 145 Kódigu Penál kona-ba ofensa ba integridade fízika simples.

Iha prosesu tentativa konsiliaun ne'e arguida rekoñese nia sala no husu diskulpa ba lezadu. Lezadu perdua arguida no hakarak deziste tiha prosesu kazu ne'e tanba sira nu'udar feton no naan.

Bazeia ba pedidu dezistensia ne'e, tribunál omologa prosesu ne'e no absolve arguidu hosi akuzasaun ministériu públiku.

15. Krime kondusaun sein karta – Nú. Prosesu : 19/sum/2015/TDO

Kompozisaun Tribunál : Singulár
Juis : Dr. Joao Ribeiro
Ministériu Públiku : Dr. Ambrosio Rangel Freitas
Defeza : Dr. Afonso Gomes Fatima
Konkluzau : Kondena ho pena multa US\$150.00

Iha 14 Maiu 2015, Tribunál Distritál Oe-Cusse hala'o prosesu julgamentu ba kazu kondusaun sein karta ne'ebé involve arguidu Daniel Nessi. Kazu ne'e akontese iha 11 Maiu 2015, iha Sub-distritu Pante-Makassar, Distritu Oe-Cusse.

Ministériu Públiku akuza arguidu katak iha 11 Maiu 2015, unidade tranzitu Polísia Distritu Oe-Cusse prende arguidu nia kareta nomos hatama arguidu iha sela polísia tanba kondus truk ho Nú. Matrikula 53302.TL sein kata kondusaun.

Ministériu Públiku akuza arguidu kontra artigu 207 Kódigu Penál kona-ba kondusaun sein karta.

Iha prosesu julgamentu arguidu konfesa no ninia hahalok no deklarata katak nia servisu nu'udar kondutor foin fulan 6. Arguidu mós deklarata katak antes ne'e nia komete ona krime ofensa ba integridade fízika simples no hetan ona kondensasaun pena multa hosi tribunál.

Iha alegasaun finál, ministériu públiku konsidera faktus provadu no husu ba tribunál atu aplika pena multa US\$120.00 ne'ebé kada laron sei selu US\$1.00 durante laron 120.

Entretantu, defeza konsidera arguidu nia arependimentu no atetudi durante prosesu julgamentu, tanba ne'e husu justisa ba tribunál tuir arguidu nia kulpa.

Depois rona tiha alegasaun final hosi parte sira, tribunál konklui kedas prosesu ne'e no kondena arguidu ho pena multa US\$150.00 ne'ebé kada laron sei selu US\$1.00 durante laron 150. Tribunál mós aplika pena alternativa 90 iha prizaun kuandu arguidu la selu pena multa refere.

16. Krime ofensa ba integridade fízika simples ho natureza violénsia doméstika – Nú. Prosesu : 52/krime/2015/TDO

Kompozisaun Tribunál	: Singulár
Juis	: Dr. João Ribeiro
Ministériu Públiku	: Dr. Ambrosio Rangel Freitas
Defeza	: Dr. Calisto Tout
Konkluzau	: Kondena ho pena prizaun tinan 1 fulan 6 suspende ba tinan 2

Iha 15 Maiu 2015, Tribunál Distritál Oe-Cusse prezide julgamentu ba kazu ofensa ba integridade fízika simples ne'ebé involve arguidu CO hasoru nia feen. Kazu ne'e akontese iha 13 Setembru 2014, iha Distritu Oe-Cusse.

Ministériu Públiku akuza katak iha 13 Setembru 2014, maizumenus iha tuku 08:00 dader, arguidu duni lezada sai hosi uma no lezada ba toba tiha iha klínika durante semana rua. Kazu ne'e akontese tanba lezada husu osan rezultadu faan ikan maibé arguidu dehan katak nia grupu seidak fahe osan refere. Depoisde ne'e, lezada ba husu tutan ba arguidu nia kolega sira no sira dehan katak osan fo ona no lezada husu fila fali ba arguidu maibé arguidu nervozu no duni lezada.

Iha 19 Setembru 2014, maizumenus tuku 08:00 dader, arguidu foti fiu eletrisidade ida baku dala barak iha lezada nia isin tanba lezada la fo osan atu partisipa iha lia adat. Aktu ne'e resulta

lezada sofre moras, bubu, metan iha hasan, ain kabun, kotuk laran, nomós kanek kiik iha lezada nia liman loos. Kazu ne'e junta mós ho relatóriu médiku no fotografia hosi postu saúde.

Ministériu Públiku akuza arguidu kontra artigu 145 Kódigu Penál kona-ba ofensa ba integridade fízika simples konjuga ho artigu 35 (b) Lei Kontra Violénsia Doméstika.

Iha prosesu julgamentu arguidu konfesa katak faktus iha akuzasaun ne'e loos hotu, arrepende no promete sei la repete iha futuru.

Iha alegasaun finál, ministériu públiku husu ba tribunál atu kondena arguidu ho pena prizaun tinan 1 fulan 6 suspende ba tinan 2 hodi prevene krime ne'e akontese tan iha futuru.

Entretantu, defeza husu ba tribunál atu kondena arguidu ho pena adekuaadu bazeia ba sirkunstansia atenuantes no agravantes.

Depois alegasaun finál hosi ministériu públiku no defeza, tribunal konklui kedas prosesu kazu ne'e no kondena arguidu ho pena prizaun tinan 1 fulan 6 suspende ba tinan 2.

17. Krime ofensa ba integridade fízika simples ho natureza violénsia doméstika – Nú. Prosesu : 53/krime/2015/TDO

Kompozisaun Tribunál	: Singulár
Juis	: Dr. João Ribeiro
Ministériu Públiku	: Dr. Ambrosio Rangel Freitas
Defeza	: Dr. Calisto Tout
Konkluzau	: Kondena ho pena prizaun tinan 1 suspende ba tinan 1

Iha 15 Maiu 2015, Tribunál Distritál Oe-Cusse julga arguidu AE ne'ebé prátika krime ofensa ba integridade fízika simples hasoru nia oan (SE) ho idade tinan 2 no nia feen (CE). Kazu ne'e akontese iha 24 Setembru 2014, iha Distritu Oe-Cusse.

Ministériu Públiku akuza katak iha 24 Setembru 2014, maizumenus iha tuku 18:00 lorokraik, arguidu baku nia feen dala ida iha nia-feen ninia ulun, tuku dala ida iha liman no buti iha lezada nia kakorok. Agreasaun ne'e mós rezulta arguidu nia liman kona-ba kois ba sira nia SE nu'udar sira nia-oan. Kazu ne'e akontese tanba lezada fila tarde wainhira arguidu haruka lezada ba husu aimanas iha arguidu nia feton nia uma.

Ministériu Públiku akuza arguidu kontra artigu 184 Kódigu Penál kona-ba ofensa ba integridade fízika negligente hasoru nia oan no artigu 145 Kódigu Penál kona-ba ofensa ba integridade fízika simples konjuga ho artigu 35 (b) Lei Kontra Violénsia Doméstika hasoru nia feen. Kazu ne'e junta mós ho relatóriu médiku no fotografia hosi postu saúde.

Iha prosesu ne'e, tribunál halo tentativa konsiliaun ba kazu ofensa ba integridade fízika negligente ne'ebé arguidu komete hasoru nia oan tanba krime ne'e ho natureza semi públiku. Iha prosesu konsiliaun ne'e, lezada CE ne'ebé representa nia-oan SE hakarak deziste kazu ne'e.

Bazeia ba pedidu dizistensia ida ne'e, tribunál omologa tiha prosesu kazu ne'e no absolve arguidu hosi krime ida ne'e.

Enkuantu relasiona ho kazu hasoru CE, arguidu rekoñese katak nia komete duni krime ne'e no deklarata katak nia arrepende no promete sei la repete iha futuru.

Iha alegasaun finál, husu ba tribunál atu kondena arguidu ho pena prizaun tinan 9 suspende ba tinan 1. Entretantu defeza husu ba tribunál atu aplika pena ne'ebé adekuaudu ba arguidu tuir sirkunstansia atenuantes no agravantes hosi krime ne'e.

Depois rona tiha alegasaun finál hosi ministériu públiku no defeza, tribunál konklui prosesu kazu ne'e no kondena arguidu ho pena prizaun tinan 1 suspende ba tinan 1.

18. Krime ofensa ba integridade fízika simples – Nú. Prosesu : 55/krime/2015/TDO

Kompozisaun Tribunál	: Singulár
Juis	: Dr. João Ribeiro
Ministériu Públiku	: Dr. Ambrosio Rangel Freitas
Defeza	: Dr. Calisto Tout
Konkluzau	: Omologa

Iha 15 Maiu 2015, Tribunál Distritál Oe-Cusse hala'o prosesu julgamentu ba krime ofensa ba integridade fízika simples ne'ebé involve arguida JF hasoru nia alin, iha 03 Feveireiru 2015, iha Distritu Oe-Cusse.

Ministériu Públiku akuza arguida katak iha 03 Feveireiru 2015, maizumenus iha tuku 17:00 lorokraik, arguida foti butir aimoruk paracetamol ida no tuda iha lezadu nia hirus matan no buti iha lezadu nia kakorok. Kazu ne'e akontese tanba lezadu du'un arguida foti nia osan US\$4.50 ne'ebé lakon.

Ministériu Públiku akuza arguida kontra artigu 145 Kódigu Penál kona-ba ofensa ba integridade fízika simples.

Antes ne'e, ministériu publiku akuza arguida kontra artigu 145 Kódigu Penál konjuga ho artigu 35 (b) Lei Kontra Violénsia Doméstika. Maibé iha prosesu julgamentu, tribunál halo alterasaun jurídika ba fali artigu 145 Kádigu Penál kona-ba ofensa ba integridade fízika simples tanba lezadu la dependensia ekonómia ba arguida.

Bazeia ba prosesu alterasaun ne'e, tribunál halo tentativa konsiliaun. Iha tentativa konsiliaun ne'e arguida rekoñese nia sala no husu diskulpa ba lezadu no deziste tiha prosesu kazu ne'e.

Bazeia ba pedidu dezistensia ne'e, tribunál omologa prosesu ne'e no absolve arguida hosi akuzasaun ministériu públiku.

19. Krime ofensa ba integridade fízika simples ho natureza violénsia doméstika – Nú. Prosesu : 54/krime/2015/TDO

Kompozisaun Tribunál : Singulár
Juis : Dr. João Ribeiro
Ministériu Públiku : Dr. Ambrosio Rangel Freitas
Defeza : Dr. Calisto Tout
Konkluzau : Kondena ho pena prizaun tinan 2 suspende ba tinan 2

Iha 15 Maiu 2015, Tribunál Distritál Oe-Cusse julga arguidu MS ne'ebé involve krime krime ofensa ba integridade fízika simples hasoru nia feen, iha 31 Outubru 2014, iha Distritu Oe-Cusse.

Ministériu Públiku akuza arguidu katak iha 31 Outubru 2014, arguidu basa dala ida iha lezada nia matan karuk, foti ai ida baku dala ida iha kelen dala haat iha kotuk laran, dala ida iha liman karuk no dala ida iha tilun no rezulta lezada sofre kanek iha liman parte karuk.

Kazu ne'e akontese tanba lezada obriga aan atu ba husu osan iha ema ne'ebé deve sira nia osan maske arguidu la autoriza. Kazu ne'e junta mós ho relatóriu médiku no fotografia hosi pradet.

Ministériu Públiku akuza arguidu kontra artigu 145 Kódigu Penál kona-ba ofensa ba integridade fízika simples konjuga ho artigu 35 (b) Lei Kontra Violénsia Doméstika.

Iha prosesu julgamentu arguidu konfesa no rekoñese faktus hotu deklara mós katak to'o agora sira seidak dame tanba lezada rasik lakohi atu dame ho arguidu.

Iha parte seluk, lezada deklara katak nia sempre hetan baku nune'e nia lakohi ona atu moris hamutuk ho aguidu nu'udar feen ho laen.

Iha alegasaun finál, ministériu públiku husu ba tribunál atu kondena arguidu ho pena prizaun tinan 1 fulan 6 maibé suspende ba tinan 2 atu prevene krime ne'e tanba violénsia doméstika nia aas iha Oe-Cusse.

Entretantu defeza husu ba tribunál atu aplika pena ne'ebé adekuadu tuir arguidu nia kulpa tanba arguidu kolabora diak ho tribunál, konfesa, arrende ninia hahalok no promete sei la repete iha futuru. Aleinde ne'e, arguidu hakarak moris hamutuk nu'udar feen no laen maske lezada rasik lakohi.

Depois alegasaun finál, tribunál konklui prosesu ne'e no kondena arguidu ho pena prizaun tinan 2 suspende nafatin ba tinan 2.

20. Krime kondusaun sein karta – Nú. Prosesu : 71/krime-sum/2015/TDO

Kompozisaun Tribunál : Singulár
Juis : Dr. Joao Ribeiro
Ministériu Públiku : Dr. Ambrosio Rangel Freitas
Defeza : Dr. Afonso Gomes Fatima
Konkluzau : Kondena ho pena multa US\$120.00

Iha 18 Maiu 2015, Tribunál Distritál Oe-Cusse hala'o prosesu julgamentu ho ajenda leitura sentensa ba kazu krime kondusaun sein karta ne'ebé involve arguidu Jose Tanake Metan iha 16 Novembru 2014, iha Pante-Makassar, Oe-Cusse.

Tribunál prova katak iha 16 Novembru 2014, maizumenus tuku 10:00 dader, unidade tranzitu PNTL Distritu Oe-Cusse prende arguidu tanba lori motor hosi diresaun Tono - DHS Oe-Cusse vila sein karta kondusaun no laiha número plat.

Ministériu Públiku akuza arguidu kontra artigu 207 Kódigu Penál kona-ba krime kondusaun sein karta.

Depois avalia faktus sira ne'ebé produz durante julgamentu, tribunál konklui prosesu ne'e no kondena arguidu ho pena multa US\$120.00 ne'ebé kada loron selu US\$1.00 durante loron 120. Tribunál mós aplika pena alternativa durante loron 80 prizaun kuandu arguidu la selu pena multa refere.

Antes ne'e, iha prosesu julgamentu arguidu deklara katak loos duni nia laiha karta kondusaun no laiha número plat. Arguidu mós deklara katak, nia arrepente no agora dadaun arguidu iha ona karta kondusaun.

Iha alegasaun finál, ministériu públiku husu ba tribunál atu aplika pena multa US\$90.00 ne'ebé kada loron arguidu sei selu US\$1.00 durante loron 90.

Entretantu, defeza hare arguidu konfesa faktu sira integralmente. Tanba ne'e husu atu konsidera sirkunstansia atenuantes no agravantes sira hosi kazu ne'e no husu justisa tuir arguidu nia kulpa.

21. Krime ofensa ba integridade fízika simples ho natureza violénsia doméstika – Nú. Prosesu : 69/krime/2015/TDO

Kompozisaun Tribunál	: Singulár
Juis	: Dr. João Ribeiro
Ministériu Públiku	: Dr. Ambrosio Rangel Freitas
Defeza	: Dr. Calisto Tout
Konkluzau	: Kondena ho pena prizaun tinan 2 suspende ba tinan 3

Iha 18 Maiu 2015, Tribunál Distritál Oe-Cusse prezide leitura sentensa ba kazu ofensa ba integridade fízika simples ne'ebé involve arguidu CLC hasoru nia feen. Kazu ne'e akontese iha 10 Janeiru 2015, iha Distritu Oe-Cusse.

Tribunál prova katak iha 10 Janeiru 2015, maizumenus iha tuku 10:00 dader, arguidu tuku dala ida iha lezada nia kotuk laran, tebe dala rua iha kelen loos, basa dala ida iha ibun no tuku dala ida iha reen-toos. Aktu hirak ne'e rezulta lezada sofre bubu no mean iha nia-isin sira ne'ebé arguidu baku.

Tribunál deskobre katak kazu ne'e akontese tanba hamonu tiha sana besi ida maske la too aat no lezada nia banin fetu hirus, nune'e halo arguidu nervozu no baku lezada. Iha momentu ne'ebá lezada ko'us hela sira nia-oan. Kazu ne'e junta ho relatóriu mediku no fotografia hosi Pradet.

Ministériu Públiku akuza arguidu kontra artigu 145 Kódigu Penál kona-ba ofensa ba integridade fízika simples konjuga ho artigu 35 (b) Lei Kontra Violénsia Doméstika.

Iha prosesu julgamentu arguidu konfesa faktu sira no rekoñese nia hahalok no promete sei la repete iha futuru. Arguidu mós deklara katak antes ne'e nia hetan ona kondenasau hosi tribunál ho pena suspensaun ba krime ofensa ba integridade fízika simples.

Iha alegasaun finál, ministériu públiku husu ba tribunál atu kondena arguidu ho pena prizaun tinan 2 suspende ba tinan 3 tanba arguidu konfesa no rekoñese ninia hahalok. Entretantu defeza husu ba tribunál atu fo justisa tuir arguidu nia kulpa tanba arguidu konfesa faktus, arrepende ba ninia hahalok no kolabora diak ho tribunál.

Bazeia ba faktus provadu, tribunál kondena kondena arguidu ho pena prizaun tinan 2 suspende ba tinan 3.

22. Krime ofensa ba integridade fízika simples ho natureza violénsia doméstika – Nú. Prosesu : 56/krime/2015/TDO

Kompozisaun Tribunál	: Singulár
Juis	: Dr. João Ribeiro
Ministériu Públiku	: Dr. Ambrosio Rangel Freitas
Defeza	: Dr. Afonso Gomes Fatima
Konkluzau	: Kondena ho pena prizaun tinan 1 suspende ba tinan 1 fulan 6

Iha 18 Maiu 2015, Tribunál Distritál Oe-Cusse hala'o prosesu julgamentu ba krime ofensa ba integridade fízika simples ne'ebé involve arguidu DT hasoru nia feen, iha 15 Feveireu 2015, iha Distritu Oe-Cusse.

Ministériu Públiku akuza katak iha 15 Feveireu 2015, maizumenus iha tuku 09:00 dader, arguidu foti aisanak ida baku dala ida iha lezada nia kotuk laran, iha liman loos, iha ain sorin karuk no dala ida iha kakorok sorin loos. Aktu hirak ne'e rezulta lezada sofre mean iha nia kotuk laran, bubu iha liman no ain sorin karuk no labele tolan kaben tanba moras. Kazu ne'e junta mós ho relatóriu médiku no fotografia hosi postu saude. Kazu ne'e akontese tanba lezada toba tiha iha kuartu sorin sein fo hatene ba arguidu.

Ministériu Públiku akuza arguidu kontra artigu 145 Kódigu Penál kona-ba ofensa ba integridade fízika simples konjuga ho artigu 35 (b) Lei Kontra Violénsia Doméstika.

Iha prosesu julgamentu arguidu konfesa faktu sira iha akuzasaun, arrepende no deklara katak sira dame malu ona no selu ona multa ba lezada nia inan aman hamutuk US\$100.00. Arguidu mós foin primeira- vez hatan iha tribunál.

Iha alegasaun finál, ministériu públiku husu ba tribunál atu kondena arguidu ho pena prizaun tinan 1 suspende ba tinan 1 fulan 6 atu prevene akontesimentu krime hanesan iha futuru.

Entretantu defeza husu ba tribunál atu fo justisa tuir arguidu nia sala tanba arguidu kolabora diak ho tribunál, arrende ba ninia hahalok no iha oan nain haat.

Depois alegasaun finál, tribunál konklui prosesu ne'e no kondena arguidu ho pena prizaun tinan 1 suspende ba tinan 1 fulan 6.

23. Krime ofensa ba integridade física simples ho natureza violência doméstica – Nú. Proesu : 58/krime/2015/TDO

Kompozisaun Tribunál : Singulár
Juis : Dr. João Ribeiro
Ministériu Públiku : Dr. Ambrosio Rangel Freitas
Defeza : Dr. Afonso Gomes Fatima
Konkluzau : Kondena ho pena prizaun fulan 9 suspende ba tinan 1 fulan 6

Iha 18 Maiu 2015, Tribunál Distritál Oe-Cusse julga arguidu HdS ne'ebé involve iha ofensa ba integridade física simples hasoru nia feen, iha 12 Feveiru 2015, iha Distritu Oe-cusse.

Ministériu Públiku akuza arguidu katak iha 12 Feveiru 2015, maizumenus iha tuku 17:00 lorokraik, arguidu tuku dala rua iha lezada nia hasan sorin loos no dala ida iha lezada nia ibun. Aktu ne'e rezulta lezada nia nehan nakdoko no hasan bubu. Kazu ne'e akontese tanba lezada la fo osan US\$5.00 atu ense mina motor ojek. Kazu ne'e junta ho relatóriu médiku no fotografia hosi ospital referal Oe-Cusse.

Ministériu Públiku akuza arguidu kontra artigu 145 Kódigu Penál kona-ba ofensa ba integridade física simples konjuga ho artigu 35 (b) Lei Kontra Violência Doméstica.

Iha prosesu julgamentu, arguidu deklara katak akuzasaun hosi ministériu públiku loos hotu.

Iha alegasaun finál, ministériu públiku husu ba tribunál atu kondena arguidu ho pena prizaun tinan 1 suspende ba tinan 1 fulan 6 nomós konsidera katak krime ho natureza violência doméstica aas iha Rejiaun Oe-Cusse.

Entretantu, defeza husu ba tribunál atu fo justisa tuir arguidu nia sala no argumenta katak arguidu kolabora diak ho tribunál no arrende ba ninia hahalok.

Depois rona alegasaun finál hosi ministériu públiku no defeza, tribunál konklui kedas prosesu kazu ne'e no kondena arguidu ho pena prizaun fulan 9 suspende ba tinan 1 fulan 6.

24. Krime ofensa ba integridade física simples ho natureza violência doméstica – Nú. Proesu : 59/krime/2015/TDO

Kompozisaun Tribunál : Singulár

Juis : Dr. João Ribeiro
Ministériu Públiku : Dr. Ambrosio Rangel Freitas
Defeza : Dr. Afonso Gomes Fatima
Konkluzau : Kondena ho pena prizaun tinan 1 suspende ba tinan 1

Iha 18 Maiu 2015, Tribunál Distritál Oe-Cusse prezide julgamentu ba krime ofensa ba integridade fízika simples ne'ebé involve arguidu JN hasoru nia feen. Kazu ne'e akontese iha 03 Feveireiru 2015, iha Distritu Oe-cusse.

Ministériu Públiku akuza katak iha 03 Feveireiru 2015, maizumenus iha 11:00 kalan, arguidu tuku dala ida iha lezada nia matan fukun okos no tuku dala haat iha lezada nia ain kabun. Aktu ne'e rezulta lezada sofre kanek iha matan fukun okos.

Kazu ne'e akontese tanba sira nia oan (bebe) tanis no lezada la hader no arguidu mak ko'us no halo susu-been no fo ba bebe ne'e. Maibé bebe ne'e tanis nafatin, nune'e, arguidu nervozu no baku lezada. Kazu ne'e junta mós ho relatóriu médiu no fotografia hosi Ospital Referral Oe-Cusse.

Ministériu Públiku akuza arguidu kontra artigu 145 Kódigu Penál kona-ba ofensa ba integridade fízika simples konjuga ho artigu (35) Lei Kontra Violénsia Doméstika.

Iha prosesu julgamentu arguidu konfesa no rekoñese faktu sira hosi akuzasaun no deklarata katak arrepende ninia hahalok no foin primeira-vez mai iha tribunál.

Iha parte seluk, lezada deklarata katak arguidu foin primeira-ves baku nia no agora dadaun sira dame malu ona.

Iha alegasaun finál, ministériu públiku husu ba tribunál atu kondena arguidu ho pena prizaun tinan 1 suspende ba tinan 1 fulan 6 tanba krime hanesan ne'e aas iha Distritu Oe-Cusse.

Entretantu defeza husu tribunál fo justisa ba arguidu tanba konsidera katak arguidu rekoñese no arrepende ba ninia hahalok, dame malu ona ho lezada no kolabora diak ho tribunál.

Tribunál konklui prosesu kazu ne'e no kondena arguidu ho pena prizaun tinan 1 suspende nafatin ba tinan 1.

25. Krime ofensa ba integridade fízika simples hasoru menór ho natureza violénsia doméstika – Nú. Prosesu : 57/krime/2015/TDO

Kompozisaun tribunál : Singulár
Juis : Dr. João Ribeiro
Ministériu Públiku : Dr. Ambrosio Rangel Freitas
Defeza : Dr. Afonso Gomes Fatima
Konkluzau : Sei kontinua prosesu

Iha 18 Maiu 2015, Tribunál Distritál Oe-Cusse hala'ó prosesu julgamentu ba krime ofensa ba integridade fízika simples ne'ebé involve arguida LC (avo-feto) arguida ENL (tian no arguidu CL (tiun) hasoru CT, AgT no AT (tinan 6- 9) nu'udar (arguida) LC nia bei-oan no ENL no arguidu CL sira nia subriña, ne'ebé akontese iha 2014, iha Distritu Oe-cusse.

Ministériu Públiku akuza katak ha tinan 2014, sein motivu ruma arguidu no arguida sira lori tali masa no ai sanak baku dala barak iha lezada sira iha kotuk laran, kabun no hasan no rezulta lezada sira sofre bubu no kanek kiik iha isin-lolon. Kazu ne'e junta mós ho relatóriu m'ediku no fotografia hosi postu Saúde.

Lezada sira hela hamutuk ho arguidu no arguida sira desde tinan 2012, wainhira sira nia inan no fahe malu no halai soe hela sira nain tolu ba hela hamutuk fali ho arguidu/a sira.

Ministériu Públiku akuza arguidu no arguida sira kontra artigu 145 Kódigu Penál kona-ba ofensa ba integridade fízika simples konjuga ho artigu 35 (b) Lei Kontra Violénsia Doméstika.

Iha julgamentu arguidu no arguida sira konfesa no rekoñese sira ninia hahalok no deklara katak sira dame-malu ona ho lezada nain tolu no nunca mosu problema to'ó agora. Lezada CT mós deklara katak sira dame malu ona no hela hamutuk nafatin hanesan bain-bain.

Iha alegasaun final, ministériu públiku husu ba tribunál atu kondena arguida LC ho pena prizaun tinan 2 fulan 6 maibé suspende ba tinan 3. Entretantu arguidu no arguida na'in rua seluk, husu ba tribunál atu kondena ho pena prizaun tinan 2 maibé suspende ba tinan 3.

Iha parte seluk defeza husu ba tribunál atu fo justisa tuir arguidu no arguida sira nia kulpa tanba arguidu no arguida sira konfesa, rekoñese, arrepende sira ninia hahalok, promete sei la repete iha futuro, kolabora diak ho tribunál no dame malu ona ho lezada sira.

Depois rona tiha deklarasaun ikus hosi arguidu no arguida sira, tribunál marka fali prosesu julgamentu ba iha 08 Juñu 2015, tuku 08:00 dader ho agenda leitura sentensa.

26. Krime ofensa ba integridade fízika simples ho natureza violénsia doméstika – Nú. Prosesu : 76/krime/2015/TDO

Kompozisaun Tribunál	: Singulár
Juis	: Dr. João Ribeiro
Ministériu Públiku	: Dr. Ambrosio Rangel Freitas
Defeza	: Dr. Calisto Tout
Konkluzau	: Kondena ho pena prizaun tinan 1 fulan 6 suspende ba tinan 1 fulan 6

Iha 19 Maiu 2015, Tribunál Distritál Oe-Cusse julga arguidu LC ne'ebé komete krime ofensa ba integridade fízika simples hasoru OdFA nu'udar nia feen. Kazu ne'e akontese iha 15 Feveireiru 2015, iha Distritu Oe-Cusse.

Ministériu Públiku akuza arguidu katak iha 15 Feveireiru 2015, maizumenus iha tuku 12:00 meudia, depois han hotu arguidu basa dala ida iha lezada nia kanuruk tanba ne'e lezada halai ba toba tiha iha kios laran. Arguidu tuir ba kios, tebe odamatan kios no tama ba kios laran, sama lezada nia kalilin iha parte loos, tuku dala rua iha lezada nia hirus matan, dala ida iha ulun no iha reen-toos. Aktu ne'e kauza lezada sofre moras. Kazu ne'e junta ho relatóriu médiku no fotografia hosi postu saúde.

Kazu ne'e akontese tanba lezada la konkorda arguidu haruka arguidu nia alin feto na'in rua ba hili ai maran iha oras meudia depois han. Lezada hakarak, depois diskansa mak foin ba hili aimaran.

Ministériu Públiku akuza arguidu kontra artigu 145 Kódigu Penál kona-ba ofensa ba integridade fízika simples konjuga ho artigu 35 (b) Lei Kontra Violénsia Doméstika.

Iha prosesu julgamentu arguidu konfesa faktus integralmente, arrepende ninia hahalok no deklara katak sira dame-malu ona.

Iha alegasaun finál, ministériu públiku husu ba tribunál atu kondena arguidu ho pena prizaun tinan 1 fulan 6 suspende ba tinan 1 fulan 6 nu'udar meu ida atu halo prevensaun ba krime ne'e. Entretantu, defeza husu ba tribunál atu fo justisa tuir arguidu nia sala bazeia ba sirkunstansia atenuantes hanesan kolabora diak ho tribunál no arrepende ba ninia hahalok.

Tribunál konklui prosesu kazu ne'e no kondena arguidu ho pena prizaun tinan 1 fulan 6 suspende nafatin ba tinan 1 fulan 6.

27. Krime kondusaun sein karta – Nú. Prosesu : 75/krime/2015/TDO

Kompozisaun Tribunál	: Singulár
Juis	: Dr. Joao Ribeiro
Ministériu Públiku	: Dr. Ambrosio Rangel Freitas
Defeza	: Dr. Afonso Gomes Fatima
Konkluzau	: Kondena ho pena multa US\$165.00

Iha 19 Maiu 2015, Tribunál Distritál Oe-Cusse prezide julgamentu ba kazu krime kondusaun sein karta ne'ebé involve arguidu Cipriano Colo no Gilfredo Colo. Kazu ne'e akontese iha 16 Feveireiru 2015, iha Sub-distritu Pante-Makassar, Distritu Oe-cusse.

Ministériu Públiku akuza katak iha 16 Feveireiru 2015, Unidade Tranzitu PNTL Distritu Oe-Cusse halo pasa revista ba dokumentus transporte no prende arguidu sira ne'ebé kondus motor Yamaha no Revo sein karta kondusaun. Polísia hatama arguidu na'in rua ba sella polísia no prende hotu motor rua ne'e.

Ministériu Públiku akuza arguidu sira kontra artigu 207 Kódigu Penál kona-ba krime kondusaun sein karta.

Iha prosesu julgamentu, arguidu Gilfredo Colo deklara konfesa faktus integralmente maibé arguidu Cipriano Colo deklara katak motor refere la'os ninia privadu maibé kantor nian.

Iha alegasaun finál, ministériu públiku husu ba tribunál atu kondena arguidu Cipriano ho pena multa US\$90.00 no ba arguidu Gilfredo, ministériu públiku husu ba tribunál atu kondena arguidu ho pena multa US\$75.00 ne'ebé kada lora selu US\$1.00 durante lora 75.

Iha parte seluk, defeza argumenta katak arguidu sira konfesa, arrepende ninia hahalok no kolabora ho tribunál, tanba ne'e husu ba tribunál atu fo justisa ba arguidu sira tuir sira nia kulpa.

Tribunál konklui prosesu ne'e no kondena arguidu Cipriano ho pena multa US\$90.00 ne'ebé kada lora sei selu US\$1.00 durante lora 90 no pena alternativu lora 60 kumpri iha prizaun kuandu la selu pena multa refere.

Entretantu arguidu Gilfredo, tribunal kondena ho pena multa US\$75.00 ne'ebé kada lora sei selu US\$1.00 durante lora 75 no pena alternativu lora 50 kumpri iha prizaun kuandu la selu pena multa refere.

28. Krime ofensa ba integridade física simples ho natureza violénsia doméstika – Nú. Prosesu : 40/krime/2015/TDO

Kompozisaun Tribunál : Singulár
Juis : Dr. João Ribeiro
Ministériu Públiku : Dr. Ambrosio Rangel Freitas
Defeza : Dr. Calisto Tout
Konkluzau : Kondena arguidu ho pena prizaun fulan 6 suspende ba tinan 1

Iha 19 Maiu 2015, Tribunál Distritál Oe-Cusse prezide leitura sentensa no kondena arguidu FRS ho pena fulan 6 prizaun suspende ba tinan 1 tanba arguidu provadu komete krime ofensa ba integridade física simples hasoru nia feen, iha 24 Janeiru 2015, iha Distritu Oe-Cusse.

Tribunál prova katak iha 24 Janeiru 2015, maizumenus iha tuku 10:00 kalan, arguidu fila ba uma ho kondisaun lanu no husu hahan ho modo no lezada hatan katak *mie sedap*. Tanba ne'e arguidu nervozu no basa dala ida iha lezada nia kanuruk.

Bazeia ba faktus hirak ne'e hotu, tribunál konklui prosesu ne'e no kondena arguidu ho pena prizaun fulan 6 no suspende ba tinan 1.

Antes ne'e, ministériu públiku akuza arguidu kontra artigu 145 Kódigu Penál kona-ba ofensa ba integridade física simples konjuga ho artigu 35 (b) Lei Kontra Violénsia Doméstika.

Iha prosesu julgamentu antes arguidu konfesa no rekoñese ninia hahalok tuir faktus hosi akuzasaun laran.

29. Krime ofensa ba integridade física simples ho natureza violénsia doméstika – Nú. Prosesu : 41/krime/2015/TDO

Kompozisaun Tribunál : Singulár
Juis : Dr. João Ribeiro
Ministériu Públiku : Dr. Ambrosio Rangel Freitas
Defeza : Dr. Calisto Tout
Konkluzau : Kondena ho pena prizaun tinan 1 fulan 6 suspende ba tinan 2

Iha 19 Maiu 2015, Tribunál Distritál Oe-Cusse prezide leitura sentensa no kondena arguidu LC ho pena prizaun tinan 1 fulan 6 suspende ba tinan 2 tanba provadu komete krime ofensa ba integridade fízika simples hasoru nia feen ne'ebé akontese iha 29 Dezembru 2014, iha Distritu Oe-Cusse.

Tribunál prova katak iha 29 Dezembru 2014, maizumenus iha tuku 11:00 kalan, arguidu ho kondisaun lanu foti bisekleta baku iha lezada nia matan fukun no rezulta kanek. Kazu ne'e akontese tanba lezada lakohi sae bisekleta labarik nian ba iha arguidu nia bin nia uma.

Tribunál mós prova katak iha 31 Dezembru 2014, maizumenus iha tuku 18:00 lorokraik, arguidu dehan ba lezada katak hanorin labarik sira atu labele toman husu osan ba ema. Lezada foin mak atu resposta, arguidu tuda kedas telefone kona iha lezada nia hirus matan no rezulta lezada sofre moras.

Bazeia ba faktus hirak ne'e hotu, tribunál konklui prosesu ne'e no kondena arguidu ho pena prizaun tinan 1 fulan 6 no suspende ba tinan 2.

Antes ne'e, ministériu públiku akuza arguidu kontra artigu 145 Kódigu Penál kona-ba ofensa ba integridade fízika simples konjuga ho artigu 35 (b) Lei Kontra Violénsia Doméstika.

Iha julgamentu arguidu konfesa katak faktu sira iha akuzasaun ne'e loos hotu no deklara katak nia arrepende nia hahalok, deklara katak sira dame malu ona no promete sei la repete ninia hahalok iha futuru.

Iha alegasaun finál, ministériu públiku husu ba tribunál atu kondena arguidu tinan 1 prizaun maibé suspende ba tinan 2 hodi prevene krime ne'e akontese iha futuru. Aleinde ne'e, tanba antes ne'e iha tinan 2012 arguidu komete krime violénsia doméstika dala rua ona no tribunál kondena ona arguidu ho pena multa.

Entretantu defeza husu ba tribunál atu aplika pena ne'ebé adekuaudu tuir arguidu nia kulpa no konsidera sirkunstansia atenuantes hanesan arguidu konfesa, arrepende ba ninia hahalok, kolabora diak ho tribunál no dame malu ona ho lezada.

30. Krime ofensa ba integridade fízika simples ho natureza violénsia doméstika – Nú. Prosesu : 78/krime/2015/TDO

Kompozisaun Tribunál : Singulár
Juis : Dr. João Ribeiro
Ministériu Públiku : Dr. Ambrosio Rangel Freitas

Defeza : Dr. Afonso Gomes Fatima
Konkluzau : Sei kontinua prosesu

Iha 21 Maiu 2015, Tribunál Distritál Oe-Cusse prezide julgamentu ba krime ofensa ba integridade fízika simples ne'ebé involve arguidu PT hasoru nia feen, ne'ebé akontese iha 19 Feveireiru 2015, iha Distritu Oe-Cusse.

Ministériu Públiku akuza katak iha 19 Feveireiru 2015, maizumenus iha tuku 08:00 dader, lezada simu telefone hosi nia maun no haruka lezada atu ba ajuda kuda sira nia inan nia natar. Maibé arguidu lakohi no sira haksesuk malu no arguidu kaer lezada nia kakorok kotuk riba tun ba rai. Wainhira lezada hader, arguidu basa dala ida tan iha lezada nia hasan karuk no dala ida iha hasan loos, tuku dala rua iha lezada nia reen-toos no buti lezada nia kakorok. Aktu hirak ne'e rezulta lezada sofre moras iha nia hirus matan no hasan. Kazu ne'e junta ho relatóriu médiku no fotografia hosi Pradet.

Ministériu Públiku akuza arguidu kontra artigu artigu 145 Kódigu Penál kona-ba ofensa ba integridade fízika simples konjuga ho artigu 35 (b) Lei Kontra Violénsia Doméstika.

Iha julgamentu arguidu konfesa faktus parsialmente katak nia basa duni lezada iha hasan karuk no loos maibé rejeita kaer lezada nia kakorok kotuk hodi riba tun ba rai, la tuku lezada nia reen-toos no la buti lezada nia kakorok.

Arguidu mós deklara katak antes ne'e iha tinan 2012, nia hetan ona kondenasau pena multa relasiona ho krime ofensa ba integridade fízika simples ne'ebé nia komete hasoru lezada. Iha parte seluk lezada kontinua reforsa akuzasaun hosi ministériu públiku.

Iha alegasaun finál, ministériu públiku husu ba tribunál atu kondena arguidu ho pena prizaun tinan 1 fulan 6 suspende ba tinan 2 nu'udar dalan ida atu prevene krime la bele akontese tan ba lezada no ema seluk.

Entretantu defeza argumentu katak arguidu konfesa, arrepende ba ninia hahalok no iha kolaborasaun diak ho tribunál, tanba ne'e husu ba tribunál atu fo justisa tuir arguidu nia kulpa.

Depois alegasaun finál, tribunál marka fali prosesu julgamentu ba iha 08 Juñu 2015, tuku 10:00 dader ho agenda leitura sentensa.

31. Krime ofensa ba integridade fízika simples ho natureza violénsia doméstika – Nú. Prosesu : 80/krime/2015/TDO

Kompozisaun Tribunál : Singulár
Juis : Dr. João Ribeiro
Ministériu Públiku : Dr. Ambrosio Rangel Freitas
Defeza : Dr. Afonso Gomes Fatima
Konkluzau : Kondena ho pena prizaun fulan 4 suspende ba tinan 1

Iha 21 Maiu 2015, Tribunál Distritál Oe-Cusse prezide julgamentu ba krime ofensa ba integridade fízika simples ne'ebé komete hosi arguidu DF hasoru nia feen. Kazu ne'e akontese iha 08 Marsu 2015, iha Distritu Oe-Cusse.

Ministériu Públiku akuza arguidu katak iha 08 Marsu 2015, maizumenus iha tuku 20:00 kalan, arguidu buti lezada nia kakorok no tebe dala ida iha kelen tanba lezada husu osan bebeik ba arguidu.

Ministériu Públiku akuza arguidu kontra artigu 145 Kódigu Penál kona-ba ofensa ba integridade fízika simples konjuga ho artigu 35 (b) Lei Kontra Violénsia Doméstika.

Iha julgamentu arguidu konfesa faktus integralmente, arrepende ba ninia hahalok, promete sei la repete iha futuru no deklara katak sira dame malu ona.

Iha alegasaun finál, ministériu públiku husu ba tribunál atu kondena arguidu ho pena prizaun fulan 3 suspende ba tinan 1. Entretantu defeza husu ba tribunál atu atu fó justisa ba arguidu tuir nia kulpa.

Tribunál imediatamente konklui prosesu kazu ne'e no kondena arguidu ho pena prizaun fulan 4 suspende ba tinan 1.

32. Krime ofensa ba integridade fízika simples ho natureza violénsia diméstika – Nú. Prosesu : 79/krime/2015/TDO

Kompozisaun Tribunál : Singulár
Juis : Dr. João Ribeiro
Ministériu Públiku : Dr. Ambrosio Rangel Freitas
Defeza : Dr. Afonso Gomes Fatima
Konkluzau : Adia

Iha 21 Maiu 2015, Tribunál Distritál Oe-Cusse adia prosesu adiamentu ba kazu krime ofensa ba integridade fízika simples ne'ebé involve arguidu FdSO hasoru nia feen.

julgamentu ne'e adia tanba arguidu no lezada la marka prezensa iha tribunál. Tanba ne'e, tribunál marka fali prosesu julgamentu ba iha 19 Juñu 2015, tuku 09:00 dader.

33. Krime tentativa omisídiu agravadu ho natureza violénsia doméstika – Nú. Prosesu : 67/krime/2014/TDO²

Kompozisaun Tribunál : Koletivu
Juis : Dr. João Ribeiro, Dra. Jumiaty Freitas no Dra. Albertina Neves
Ministériu públiku : Dr. Ambrosio R. Freitas no Dr. Bartolomeu de Araujo
Defeza : Dr. Afonso G. Fatima, Dr. Marcelino Marques Coro no Dr.

² Favor lee Komunikadu Imprensa JSMP : Tribunál Distritál Oe-Cusse kondena arguidu ba kazu krime tentativa omisídiu agravadu ho natureza violénsia doméstika ho pena tinan 5 prizaun iha www.jsmp.tl; edisaun 10 Juñu 2015

Konkluzau
Francisco Caetano Martins
: Kondena ho pena prizaun tinan 5

Iha 29 Maiu 2015, Tribunál Distritál Oe-Cusse liuhosi Tribunál Distritál Dili prezide julgamentu leitura akordaun no kondena arguidu JB ho pena prizaun tinan 5 tanba provadu komete krime tentativa omisídiu agravadu hasoru nia feen. Kazu ne'e akontese iha 02 Novembru 2014, iha Distritu Oe-Cusse.

Tribunál konklui prosesu ne'e no kondena arguidu ho pena tinan 5 prizaun. Tribunál mós husu ba arguidu atu hatudu hahalok diak durante iha prizaun laran nune'e bele hetan direitu ba liberdade kondisional tinan 2 fulan 6.

Sumariu kazu ida ne'e bele imprimi tan ho apoiu jenerozu husi povu Amerikanu liu husi Ajensia Estados Unidos ba Dezenvolvimentu Internasionál (USAID) bazeia ba Akordu Kooperasaun ho Número AID-486-A-13-00007 ba programa Ba Distrito iha Timor-Leste, ne'ebe nia implementasaun lidera husi Ajensia Counterpart International ho nia parseiru sira. JSMP mak responsabiliza tomak ba konteudu no hanoin iha kommunikadu impresna ida ne'e nia laran no la nesesariamente refleta USAID ka Governu Estados Unidos Amerikanu nia opiniaun".

Atu hetan tan informasaun, favór ida kontaktu:

Luis de Oliveira Sampaio
Diretór Ezekutivu JSMP
E-mail: luis@jsmp.mihihub.org